

పిలిప్పియుల్క రెగిడ్లి ఉత్తుమ్ బారిక్ జలో పవులు పిలిప్పి పట్టుమ్చ సంగుమ్చక రెగిడ్లి ఉత్తుమ్

మొదొల్ కోడు

¹ పిలిప్పి పట్టుమ్తెచ *క్రీస్తు జలో యేసుక నంపజా జోచి సుద్ది జా జోచయ్ జా, జోచి తెడి తిల మాన్సుల్క, పడ్డొ తుమ్చ సేవ కెర్తొస్క చి జోచి తెడి సంగుమ్చి సేవ కెర్తొ అన్నె వెల్లెల మాన్సుల్క, యేసుక్రీస్తుచి సేవ కెర్తొ జోచ †గొత్తి మాన్సుల్ జల పవులు, అన్నె తిమోతి రెగిడ్లి ఉత్తుమ్.

² అమ్క అబ్బొ జలో దేముడు అన్నె ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

పిలిప్పియుల్చి రిసా పవులుచి సర్ద

³ తుమ్చి రిసా ఆవ్ కెయక ఉచర్లె కి, తుమ్చి రిసా అంచి సర్ద ఆవ్ దేముడుక సంగితసి. ⁴ తుమ్చి రిసాచి ఎత్తి అంచి ప్రార్దన పూర్తి సర్ద తెన్ కెర్తసి. ⁵ కిచ్చొక ఒగ్గర్ సర్ద జతసి మెలె, తుమ్ నంపజలి †మొదొల్ తెంతొ, అప్పె ఎద కి తుమ్ అంచి తెన్ బెద, నుబుమ్ కబుర్ నూనయ్తినతె అంక కీతోడు అస్సున్. ⁶ దేముడు తుమ్చి పెట్టి మొదొల్ కెర్లి చెంగిల్ కామ్, యేసుక్రీస్తు ఈంజ లోకుమ్తె అన్నె ఉత్త జెతి దీసి ఎదక, జో దేముడు అబ్బొసి జా కామ్ సొంత పూర్తి జర్లు కెరెదె మెన, అంక దయిరిమ్ అస్సె. ⁷ తుమ్ ఎత్తిజిన్చి రిసా ఆవ్ ఇసి

* **1:1** 1:1 'క్రీస్తు' మెలె, 'తెద్రయిందె' మెన పూర్లుమ్ ఎత్తి అదికారుమ్ తిలో దేముడు యూదుల్క సంగ తిలో దొర్లు జలో రచ్చించుప కెర్తొసా. † **1:1** 1:1 నెంజిలె 'గొతిమాన్సుల్ రిత'. ‡ **1:5** 1:5 బారికుల్ 16:12-40. § **1:5** 1:5 పిలిప్పియుల్ 1:19 ప్రార్దన కెర తిల. 2:25-30 ఎపప్రాదితుక పవులుతె తోడు తెద్రవ తిల, చి 4:10-11 చి 14-18 డబ్బుల్ తెద్రవ తిల.

ఉచరుక చెంగిల్. కిచ్చొక మెలె, తుమ్చి రిసా అంక ఒగ్గర్ ప్రేమ, అంక దిలి దేముడుచి దయ తెన్ అంచి తెన్ తూమ్ బెద అస్సున్. సుబుమ్ కబుర్చి రిసా ఆవ్ *జేలి జలి సైమతె కి, చి రిసా జబాబుల్ దెతీన్తె కి, రుజ్జుల్ దెకయ్తీన్తె కి, తుమ్ ఎత్కిజిన్ ఆత్మతె అంచి తెన్ బెద తోడు అస్సున్. ⁸ క్రీస్తు జలొ యేసు అమ్క కెద్ది ప్రేమ దెకితయ్ గే, దస్సి ప్రేమ తెన్ తుమ్క ఆవ్ తెద్ది ఉచరై తత్తసి మెన, దేముడు సాచి అస్సి.

⁹ తుమ్చి అప్పెచి ప్రేమ అన్నె ఒగ్గర్ జవున్ మెన అంచి ప్రార్దన. ప్రబుచి రిసాచి గ్యానుమ్చి కిచ్చొ కిచ్చొ ఎత్కి అర్దుమ్ కెరంతి కిచ్చొ కిచ్చొ ఎత్కి చినితి బుద్ది జా ప్రేమతె ఒగ్గర్ జవున్ మెన ప్రార్దన కెర్తసి. ¹⁰ ఆత్మక దస్సి వడ్డిలదు మెలె, చెంగిల్ తిలిన్క గార్ తిలిన్క నిసుక జాన, చెంగిల్చిక మెన ఇస్తుమ్ జస్తె, చి క్రీస్తు అన్నె ఉత్త జా తీర్పు కెర్తె జా వెల్లి దీసి ఎదక తుమ్ ఎత్కిజిన్ ఎక్కి మెన్ను నిదానుమ్ జస్తె, చి తుమ్క 'పొరపాల్ జల' మెన కో సంగుక నెత్తిర్తి. ¹¹ తుమ్ దస్సి ప్రేమ, ఆత్మచి గ్యానుమ్ జలె, యేసుక్రీస్తుతె దొర్కు జతి పున్నిమ్చి పూర్తి పలితుమ్ తుమ్చి పెట్టి దెర్తె తయెదె, చి దేముడుచి నావ్, జోచి గవురుమ్ టీవెదె.

పవులు జేలి జా చెంగిల్ పలితుమ్ దిలిసి

¹² బావుడ్లు, తుమ్ కిచ్చొ జాననుక మెన అవ్ ఆస జతసి మెలె, అంక జర్లు జలి కస్తుమ్ ఆరి తయె నాయ్, గని సుబుమ్ కబుర్ నూనయ్తీన్క కామ్క జా అస్సి. ¹³ కీసి మెలె, క్రీస్తుక ఆవ్ నిదానుమ్ తిలి రిసాయి ఆవ్ జేలి జలిసి మెన వెల్లో అదికారిచి గేర్ జలి అదికారుల్క, అన్నె ఎత్కిజిన్ జాన అస్తి. ¹⁴ పడ్డె అన్నె, ఆవ్ జేలి జలి

* **1:7** 1:7 పవులు రోమ్తె జేలి జలి పొది ఈంజ ఉత్తుమ్ రెగిడ్డో మెన ఒగ్గర్ జిన్ ఉచర్తతి. బారికుల్ 28:16, 30, 31 దెక. పిలిప్పియుల్ 4:22 దెక. కైసర్ రానో రోమ్ పట్టుముతె తయెదె. పిలిప్పియుల్ 1:13 దెక. ప్రేతోరియచ అదికార్లు కి రోమ్తె తవుల. కైసరియ పట్టుముతె కి పవులు జేలి జా తిలొ; బారికుల్ 23:23-24:27. పిలిప్పితె కి; బారికుల్ 16:23, అన్నె యెరూసలేముతె; బారికుల్ 21:33..., గని పిలిప్పితె చి యెరూసలేముతె ఒగ్గర్ దీనల్ జేలి తయె నాయ్. ఎపెసుతె కి జేలి జా తిలన్ మెన సగుమ్జిన్ ఉచర్తతి, గని రుజ్జు నాయ్.

తెంతో ఇన్నెచ నంవజలన †ప్రబుచి తెడి ఒగ్గర్ దయిరిమ్ జా, బయిమ్ నెంతె దేముడుచి ‡కోడు ఒగ్గర్ దయిరిమ్ తెన్ సూనయ్తతి.

15 సగుమ్జిన్ జోవయించి పెట్టిచి అంచి ఉప్పిర్చి గోసక, కుస్సిదుమ్ ఉచర సుబుమ్ కబుర్ సూనయ్తతి, గని అన్నె సగుమ్జిన్ అమ్చి తెన్ సర్ద తెన్ తా సూనయ్తతి. 16 ఈంజేవ్ జలె, ప్రేమకయి సూనయ్తతి. చి సత్తిమ్ ఆవ్ రుజ్జు దెకయ్తతి రిసాయి ఆవ్ ఇన్నె జేలి తెన్ తంక దేముడుచి సెలవ్ మెన ఈంజేవ్ జాన్తి. 17 జేవ్ గోసచ, జలె, వెల్లో కెరనుక ఉచర గార్ ఆస తెన్ సుబుమ్ కబుర్ సూనయ్తతి. జోవయించి పెట్టి నిదానుమ్ తతి నాయ్, గని ఆవ్ జేలి జలోసాక అంక నొప్పి దెంక ఉచరయ్ సూనయ్తతి. 18 జలె, కిచ్చొ? జోవయించి పెట్టిచి బుద్ది మాయచి జలెకి, సత్తిమ్చి జలెకి, క్రీస్తుచి రిసాయి జేవ్ సాడుప కెర్తతి. జాచి రిసా అంక ఒగ్గర్ సర్ద.

మొర్లె చెంగిల్ గే జలె చెంగిల్ గే

19 పడ్డె, అన్నె కిచ్చొ సర్ద కచితుమ్ జయిందె మెలె, తుమ్ ప్రార్దన కెర్లె రిసా, యేసుక్రీస్తుచి ఆత్మ అంక తోడు తిలి రిసా, ఈంజేవ్ బాదల్ ఎత్తితె రచ్చించుప జయిందె మెన జాని. 20 కిసి మెలె, ఆవ్ ఓడుప జయి నాయ్, గని ఆవ్ పూర్తి దయిరిమ్ తయిందె, చి అప్పెకి కెయ్చ కి, ఆవ్ జలె కి మొర్లె కి, అంచి అగి క్రీస్తుచి గవురుమ్ డీసెదె మెన అంచి ఆస, అంచి దయిరిమ్. 21 కిచ్చొక మెలె, ఈంజ అగి ఆవ్ జలె, క్రీస్తుచి రిసాయి జితసి, జోచి కామ్ కెర్తి రిసాయి జితసి. ఆవ్ మొర్లె, జోతె గెచ్చిందె, చి అంకయ్ లాబుమ్. 22 ఆవ్ ఈంజయ్ అగి జింక జలె, క్రీస్తుచి కామ్క జెయిందె. గని జితిన్తె మొర్లిన్తె కేన్ నిసాన్దె గే, నేని. 23 ఈంజేవ్ దొన్ని మెన్సుల్ తా ఆవ్ అల్లర్ జతసి. అంచి సొంత ఇష్టుమ్ కేన్ మెలె, మొర క్రీస్తుతెయ్ గెచ్చుక; ఈంజ లోకుమ్తె

† **1:14** 1:14 మెలె, 'పవులు జేలి జలెకి ప్రబు జోవయింక తోడు అస్సె మెన రుజ్జుల్ దెక దయిరిమ్ జా....' ‡ **1:14** 1:14 నెంజిలె 'సుబుమ్ కబుర్', నెంజిలె 'కబుర్'.

ఆవ్ తతి కంట అంక జయ్యి లాబుమ్. ²⁴ గని తుమ్చి రిసా ఆవ్ ఈంజ అఱి జిలె చెంగిలి. జాకయ్ జయ్యి ముక్కిమ్. ²⁵ ఈంజ కోడు నిజామ్ మెనయ్, తుమ్ ఆత్మక అన్నె వడ్డితి రితి క్రీస్తుచి తెడి నముకుమ్ తెన్ తుమ్ సర్దసంతోసుమ్ తతి రితి, ఇసి తా తుమ్చి తెన్ తయిందె మెన ఆవ్ కచితుమ్ జాని. ²⁶ దస్సి, తుమ్చితె ఆవ్ అన్నె అయ్లె, యేసుక్రీస్తుచి తెడి అంచి రిసా తుమ్క ఒగ్గర్ సర్ద జస్తె.

క్రీస్తుచి తెడి ఎక్కి నిదానుమ్ తా

²⁷ క్రీస్తుచి సుబుమ్ కబుర్క గవురుమ్ కెర్తి రితి ముక్కిమ్క బుద్ది ఇండ, చి తుమ్క సొంత దెకిత్ రితి ఆవ్ తుమ్తె అయ్లె కి, నాయ్ మెలె నెత్త వేరతె తిలె కి, తుమ్క 'ఎక్కి ఆత్మ నిదానుమ్ తా డిట్టుమ్ టీఱ, సుబుమ్ కబుర్చి నత్తిమ్ వేర మాన్సు నంప కెర్తి రితి ఎక్కి మెన్సు, ఎక్కి కట్టు తెన్ బెద, ²⁸ కిచ్చొచి రిసా కి విరోదుమ్ సుదల్క నే బితె క్రీస్తుచి పచ్చెనచి కామ్ కెర్తతి' మెన తుమ్చి రిసా సూనిందె. తుమ్చి నిదానుమ్ తుమ్చ విరోదుమ్ సుదల్క కిచ్చొ రుజ్జు దెకయెదె మెలె, జేవ్ నాసెనుమ్ జతిసి, అన్నె తూమ్ రచ్చన జతిసి. కిచ్చొక మెలె, దేముడు సొంత ఇసి జర్గు కెర్తయ్. ²⁹ మెలె, క్రీస్తుచి నావ్ గవురుమ్ జతి రిసా తుమ్ జోక నంప కెరుక మెన, గని అన్నె కిచ్చొ మెలె, అల్లర్ సేడ ఓర్నువ జా జిసుక మెన, దేముడు తుమ్క వరుమ్ దా అస్సె. ³⁰ కిచ్చొక మెలె, తుమ్ అంచితె దెకిలి రితి, అంక తిలిసి మెన అప్పె తుమ్ సూన్లి రితి అల్లర్ తుమ్క కి అస్సె.

2

క్రీస్తుచి రితి, దాక్ కెరన

¹ జలె, క్రీస్తుతె తిలి పొది తుమ్క దయిరిమ్ దొర్కు జతయ్ మెలె, ప్రేమ తుమ్క పెల్లితయ్ మెలె, దేముడుచి సుద్ది తిలి ఆత్మ తుమ్చి పెట్టి అస్సె మెలె, తుమ్చి పెట్టి ముద్దుచి కన్కారుమ్ అస్సె జలె, ² ఎక్కి ఉద్దెసుమ్ తెన్, ఎక్కి ప్రేమ తెన్, పూర్తి ఎక్కి కట్టు తెన్, ఎక్కి మెన్సు తా, చి అంక పూర్తి సర్దసంతోసుమ్ కెర్తె. ³ సొంత గార్ ఆసక,

సొంత గవురుమ్క, తుమ్ కిచ్చొ కెర నాయ్, గని దాక్ కెరన, ఎక్కిలోక ఎక్కిలో జోచి కంటె వేర మాన్సుల్క గవురుమ్ దెకిత్ తా. ⁴ తుమ్తె ఎత్తి మాన్సు ఎక్కి సొంత దెకన నాయ్, గని, ఎక్కిలోచి రిసా ఎక్కిలో 'చెంగిల్ జతు' మెన తుమ్ వేర మాన్సుల్క కి చెంగిల్ దెక.

⁵ క్రీస్తుక తిలి జోచి తెడి దొర్కు జతి బుద్ది తుమ్చి పెట్టి తుమ్ తియన.

⁶ కిచ్చొ నే జెర్మయ్లి అగ్గె తెంతొ కి

దేముడు తెన్ జో ఎక్కి జలెకి,

'దేముడు' మెనన గవురుమ్ ఆననుక ఉచరె నాయ్,

⁷ గని, జొయ్యి దాకు కెరన, మాన్సు జా జెర్మన్ జా,

గొత్తి సుదొ రితొ జలన్.

⁸ దస్సి, మాన్సు జా జెర్మన్ జా జో జోకయి దాకు కెరన

దేముడు అబ్బొన్చి సెలవ్ కోడు జర్గు కెర,

మాన్సు సేడ్డి మొర్నుతె సేడ్లన్;

సిలువతె మొర గెలో.

జలె,

⁹ దేముడు అబ్బొన్చి సెలవ్ కోడు జర్గు కెర జో మొర్లి రిసా,

దేముడు అబ్బొసి జోక ఎత్తిచి కంట వెల్లో కెర

జోక ఎత్తి నవ్వొచి కంట వెల్లి నావ్ తియ అస్సె.

¹⁰ 'జో యేసుచి నావ్ నూన ఎత్తి మాన్సు

మొగ్రల్ టెక జోవయింక జొకర' మెనయ్.

జేవ్ పరలోకుమ్తె తిలె కి, బూలోకుమ్తె తిలె కి,

పాతలలోకుమ్తె తిలె కి, కేనె తిలె కి

జోక జొకర్లు మెనయ్

దస్సి కెర అస్సె;

¹¹ చి 'యేసుక్రీస్తు ప్రబుయి' మెన

ఎత్తి చొండి తెనె ఒప్పున్తు మెనయ్, చి

జోకయ్ గవురుమ్ జవున్

దేముడు అబ్బొన్కయ్

గవురుమ్ జెయెదె, దస్సి కెర అస్సె.

బుద్ధి ఇండితినతె ప్రబుచి సత్తిమ్చి రుజ్జు తుమ్ దెకవ

12 జలె, బావుడ్డు, అగ్గె తెంతో ఆవ్ తుమ్చి తెన్ తిలి పొది అంచి కోడు సూన్లదు. దస్సి అప్పె, ఆవ్ నెంజిలి పొది ఒగ్గర్ బియఁ దేముడు దిలి *రచ్చన తెన్ బెదితి బుద్ధి తుమ్ ఇండితె తా. 13 కిచ్చొక మెలె, జోచి ఇస్టుమ్ రితి కెర్తిన్క తుమ్ ఏక్ ఇస్టుమి జతి రితి నాయ్, గని తుమ్ జర్గు కెరుకయ్ మెన, తుమ్చి పెట్టి జో కామ్ కెర తుమ్క దేముడు సెక్తి దెతయ్. 14 తుమ్ మూర్క్కుమ్ జల వంక్టో జల మాన్సుచి నెడమె పాపుమ్ నెంజిలస రిత, మచ్చల్ నెంజిలస, అన్నె నింద నే గల్తి రితి దేముడుచి పుత్తర్గులు జతి రితి తంక, ఆగాసుమ్తె జోచి ఉజిడి దెకయ్త సుక్కల్ రిత తుమ్ జస్సె. 15 కిచ్చొ కామ్ తిలె కి, తెడి తెడి నే బాద సేడ, నే అన్మానల్ జా ఎత్తి కమొ తుమ్ కెర. 16 పడ్డె, జీవు దెతి సుబుమ్ కబుర్ తుమ్ †డిట్టుమ్ దెరన, చి క్రిస్తు అన్నె ఉత్త్ర జా ఈంజ లోకుమ్చక తీర్పు కెర్తి వెల్లి దీసిక, 'అంచి నైమ, అంచి కామ్ ఆరి కామ్క జెతిసి నెంజె' మెన దెక కెర, ఆవ్ సర్ల జయిందె. 17 తుమ్క క్రిస్తు ప్రబుక నంపజా నిదానుమ్ తెన్ జోచి సేవ కెర్తిసి చి రిసా ఆవ్ ఏక్ వేల సుచ దిలి బలి జతి రితి జంక జలెకి, తుమ్ ఎత్తిజిన్చి సర్లతె ఆవ్ బెదితసి. 18 తుమ్ కి ఇసి సర్ల తెన్ తా, అంచి సర్లతె బెద.

తిమోతిక జోవయింతె తెద్రవుక

19 తుమ్చి రిసాచి కబుర్ సూన్లె సర్ల జయిందె మెన, ప్రబు జలో యేసు సెలవ్ దిలె తిమోతిక తుమ్తె బే బేగి తెద్రవుక మెన అవ్ ఆస జతసి. 20 తిమోతిక ముల అన్నె కో దస మాన్సుల్ అంక తోడు నాయ్. తుమ్క చెంగిల్ జతు మెన జొయ్యి పూర్తి నిదానుమ్ తయెదె. 21 జేవ్ తిల మాన్సుల్ జలె, యేసుక్రిస్తుచి కామ్ కెరుక పచ్చితె తా, ఎత్తిజిన్ జోవయించి సొంతయ్ లాబుమ్ దెకన్తతి. 22 గని తిమోతి

* **2:12** 2:12 'రచ్చన', 'రచ్చించుప జతిసి' మెన ఇన్నెసంగెలె, పాపుమ్ తెంతో చిరచ్చనక సంగితసుమ్. అవ్ కెర్ల పావల్చి రిసా లయితి సిచ్చ తెంతో సయ్తాన్చి రాజిమ్ తెంతో అమ్క ఎత్తి అదికారుమ్ తిలొ దేముడు యేసుచి అత్తి రచ్చించుప కెర్తిసి. † **2:16** 2:16 నెంజిలె 'సూనయ్తె తా'.

చి నిదానుమ్ జాన్సు. అంక జో అబ్బొ మెన దెకిల్ రితి జా, పుత్తు రితో జా, సుబుమ్ కబుర్చి రిసా అంచి తెడి జో ప్రబుచి సేవ కెర్లినీ జాన్సు. 23 జాకయ్, ఆవ్ కీసి †జయిందె గే తుమ్ సూన్లె, బేగి జోక తుమ్తె తెద్రయిందె. 24 అన్నె, †ప్రబుచి తెడి అంక కిచ్చొ నముకుమ్ మెలె, జో సెలవ్ దిలె, ఆవ్ కి సొంత జెంక వాట్ తయెదె మెన అవ్ ఉచర్లసి.

ఎపప్రాదితుక జోతె తెద్రయ్ లిన్ చి

25 ఎపప్రాదితుక తుమ్తె తెద్రయ్ లె చెంగిలి మెన ఆవ్ తెద్రయ్ తసి. అంక జో బావో జా అస్సె, అంచి తెన్ బెద సుబుమ్ కబుర్ కామ్ కెర అస్సె, అంచి తెన్ జా కామ్చి రిసా బాదల్ ఓర్పువ జా అస్సె, తుమ్ జోచి అత్తి అంక తోడు కెర్లి రితి, తుమ్చి తెంతో కబుర్ జా అంక తోడు కెర అస్సె. 26 కిచ్చొక జోవయింక తుమ్తె అన్నె తెద్రయ్ తసి మెలె, ఒగ్గర్ దీసల్ జలి తుమ్క దెకె నాయ్ చి ఒగ్గర్ ఉచర్తయ్. పడ్డొ, జో జొర్జొ సెడ్లిన్ చి రిసా తుమ్ సూన్లినీ చి రిసా చింత గలన తవుల మెన జో దుకుమ్ సేడ అస్సె. 27 నిజుమి, జో మొర్తి రితి జలె, గని దేముడు జోక కన్కారుమ్ రచ్చించుప కెర్లన్. జోకయ్ నాయ్ అంక దుకుమ్చి ఉప్పిరి దుకుమ్ నే కలుగు జతి రితి కన్కారుమ్ దెకయ్ లో. 28 జాకయ్, జోక అన్నె దెక తుమ్ సర్ద జతి రిసా, జోక తుమ్తె బే బేగి తెద్రవుక ఆవ్ ఆస జా అస్సి. దస్సి, గెలో మెలె తుమ్చి రిసా ఆవ్ ఇసి బాద సేడుక నాయ్. 29 జాకయ్, *ప్రబుచి తెడి ఒగ్గర్ సర్ద తెన్ జోక తుమ్ అన్నె బెదవన. అన్నె దస మాన్సుల్ ఎత్తిజిన్క తుమ్ గవురుమ్ దెక. 30 కిచ్చొక మెలె, అంచి రిసా తుమ్ ఉచర కెరుక నెత్తిర్లి తోడు పూర్తి జర్దు కెరుకయ్ మెన, క్రీస్తుచి కామ్చి రిసా తెదొడి జో మొర గెతో.

† 2:23 2:23 ఏక్ వేల జో జేలి జలిన్క రకుమ్లు జతిన్క ఉచర్తయ్. § 2:24 2:24 మెలె 'ప్రబుచి తెడి ఆవ్ తిలి రిసా' అన్నె 'ప్రబుచి ఒగ్గర్ సెక్కిచి రిసా'. * 2:29 2:29 మెలె, 'ప్రబుచి తెడి తుమ్ తిలి రిసా, అన్నె ప్రబు సొంత జోవయింక బెదవన అన్నెచి రిసా పూర్తి....'

3

ప్రబుచి తెడి సర్ద తతిన్

1 అన్నె, ముక్కిమ్క బావుడ్లు, *ప్రబుచి తెడి తుమ్ సర్దనంతోసుమ్ తా. తుమ్క ఈంజ ఎత్తి అన్నె రెగుడుక అంక బాద నాయ్, చి ఆత్మక తుమ్క చెంగిల్ జర్గు జయెదె.

2 నూనర్లు రిత ప్రబుక విరోదుమ్ జలసచి, చెంగిల్ కెర్తసుమ్ మెన, గార్ కెర్తతి రిసా తుమ్ జాగర్త తెన్ తా. మాన్పుచి అఱి చి జోవయించి గుర్తుచి †సున్నతిచి రిసా జేవ్ బలవంతుమ్ కెర్తసచి రిసా తుమ్ జాగర్త తెన్ తా. 3 ముక్కిమ్క ప్రబుకయి కెర్తి సున్నతి కెరన్లన కొన్స మెలె, అము. కీసి మెలె, దేముడుచి సుద్ది తిలి ఆత్మచి సెక్కిక జోచి సేవ కెర్తె తా, ఆఱుక కమొచి నంప నే కెర్తె, రచ్చించుప జంక జలె క్రిస్తుయి సాలు మెనయ్ ఎక్కి క్రిస్తు జలొ యేసుచి ఉప్పిరి అమ్చి నముకుమ్ తియ, జోచి రిసాయి దయిరిమ్ తెన్ సర్ద తెన్ అన్నుమ్.

4 ఆఱుక నంప కెర్తిన్చి రిసా ఉచర్లె జలె, దస్సిచిక నంప కెరుక కామ్క జెతి జలె, అవ్వి పవులు ఒగ్గర్ దయిరిమ్ తంక జతి. 'అఱి జర్గు కెర్తిన్చి రిసా అంక చెంగిలి' మెన కో ఉచరంతతి గే, జోవయించి కంట అంకయ్ చెంగిల్ మెనుక జతి. 5 మెలె, యూదుల్చ ఆగ్గుల్ రితికయ్, ఆవ్ జెర్మ అట్టు పొదుల్క అంక జా గుర్తుచి సున్నతి కెర్ల. ఆవ్ ‡ఇస్రాయేలుడు, బెన్యామీను చి సెకుమ్తె జెర్మిలయ్, †ఎబ్రీయుల్తె జెర్మ ఎబ్రీయుడు జా జియ అస్సి. యూదుల్చ ఆగ్గుల్

* **3:1** 3:1 మెలె, 'తుమ్ జోవయించి తెడి అన్నున్ చి జో తెయి సర్దనంతోసుమ్ అన్నెచి రిసా, సర్ద...' † **3:2** 3:2 నగుమ్జన్ నంపజలన జల యూదుల్, చి యూదుల్ నెంజిల నంపజలనతె గెతె తా, జోవయించి సున్నతిచి రిసా బలవంతుమ్ కెర్తె తిల; జా సున్నతి కెర్తెకయ్ పావుమ్ తెంతొ రచ్చించుప జంక జయెదె, పరలోకుమ్తె గెచ్చుక జయెదె; మెన సిక్కి రితి. ‡ **3:5** 3:5 'ఇస్రాయేలుడు' మెలె, యూదుడు, 'ఎబ్రీయుల్' మెలె 'యూదుల్'.

§ **3:5** 3:5 'ఇస్రాయేలుడు' మెలె, యూదుడు, 'ఎబ్రీయుల్' మెలె 'యూదుల్'.

రితి కెర్తినక దెకిలె, *పరిసయ్యుడు జయిందె. అమ్ పరిసయ్యుల్ చి నిదానుమ్ రితి ఆవ్ కెర్తె తిలయ్. ⁶ జా రితి అంచి ఒగ్గర్ నిదానుమ్ ఆవ్ కిసి నెరవెర్పువ కెర్తె తిలయ్ మెలె, నంపజలసక సిచ్చల్ కెర్తె తిలయ్. చి అమ్చ ఆగ్గుల్చి పున్నిమ్చి రితి ఆవ్ కెర్తె తిలిసక దెకిలె. పొరపాట్ నెంతె తిలయ్.

⁷ గని, జా ఎత్కితె అంక కిచ్చొ లాబుమ్ తిలి గే, క్రిస్తుకయ్ పూర్తి నిదానుమ్ జంక మెన, ఎక్కి జోచి ఉప్పిరి అంచి నముకుమ్ పూర్తి తింక మెనయ్, జా వేరచి ఎత్కిక 'సంతోసుమ్' మెన దెక, ముల అస్సి. ⁸ నిజామి 'అంచొ ప్రబు జలో రచ్చించుప కెర్తొసా జలో క్రిస్తు జలో యేసుక జాన జో తెన్ ఇండితిసి ఎత్కిచి కంట చెంగిలి' మెనయ్, వేరచి ఎత్కిక నస్తుమ్ మెన దెకితసి, క్రిస్తుచి రిసాచి అంచి ప్రేమచి రిసా వేరచి ఎత్కి పిట్టవన అస్సి, వేరచి ఎత్కిక ఉన్టా మెన దెకితసి. కిచ్చొక మెలె, ముక్కిమ్క క్రిస్తుయి అంక కావలె, జొయ్యి అంక లాబుమ్, ⁹ చి జోచి తెడి తా, అంచి సొంత సెక్తిచి పున్నిమ్, మెలె ఆగ్గుల్ రితి కెర్తి పున్నిమ్ తెన్ తయె నాయ్; కక్క దస్సిచి పున్నిమ్ దెయె నాయ్, గని అంక కిచ్చొ పున్నిమ్ తయెదె మెలె, క్రిస్తుక నంపజలి వాట్క దొర్కు జతి పున్నిమ్. మెలె, జోక కో నంపజా గెలె, 'అంచొ క్రిస్తుచి పున్నిమ్ జోక' మెన దేముడు జోచి సర్లక అమ్క దెకితయ్. ¹⁰ వేరచి ఎత్కి ముల ఆవ్ అన్నె కిచ్చొ ఆస జతసి మెలె, జోవయింక జానయ్ జో అన్నె జివ్ జలి సెక్తిచి వరుమ్ నజన, జా సెక్తిక జోవయింతెన్ ఇండుక పూర్తి అలవాట్ జా, జో సేడ్ల సైమల్తె బెద, జో మొర్లి పొది కిసి తిలొ గే, ఆవ్ కి దస్సి బుద్ది జంక, ¹¹ చి దేముడు అబ్బొన్చి దయ తిలె, ఆవ్ మొర్లె, పరలోకుమ్తె గెచ్చిందె.

ప్రబు దెతి బవుమానుమ్ నజన్తి రితి నిదానుమ్ నిగుక మెలి టాలి

* **3:5** 3:5 'పరిసయ్యుడు' మెలె, యూదుల్తె పరిసయ్యుల్కయ్ ఒగ్గర్ గ్యానుమ్ తయెదె, యూదుల్చ ఆగ్గుల్ జెచ్చి ఒగ్గర్ నిదానుమ్ కెరుల, జేవ్ ఆగ్గుల్చి రిసా బలవంతుమ్ కెరుల, చి దూతల్, బూతల్, డుంబల్, ఆత్మల్క 'అస్సి' మెన నంప కెరుల, చి 'మొర్లె అన్నెక లోకుమ్తె గెచ్చుమ్దే' మెన నంప కెరుల.

12 'ప్రబు దెతి బవుమానుమ్ నజన్తి రితి జిన్లయ్' మెని నాయ్, 'ఆవ్ పూర్తి పున్నిమ్ జా అస్సి' మెని నాయ్, గని జోచొ సొంత మాన్సు జంక మెన క్రీస్తుయేసు అంక బెదవన అస్సె చి రిసా, జా బవుమానుమ్ నజనుక మెన ఆవ్ ఒగ్గర్ సెక్తి తెన్ నిగితసి. 13 బావుడ్లు, అంచి సెక్తికయ్ జిన అస్సి మెని నాయ్, గని ఎక్కి కిచ్చొ కెర్తసి మెలె, అగ్గెచి ఎత్తి పచ్చ గెల కెర, పురైతొ తిలి గురితె దొర్కు జతిసి నజనుక మెన ఎక్కి ఆన జా, 14 యేసుక్రీస్తుచి నావ్ తెన్ దేముడు దెతి బవుమానుమ్ నజనుక మెన, గురి దెక నిగితసి. 15 అమ్తె ఆత్మక కో వడ్డ అస్తి జలె, ఇసి బుద్ది తెన్ తమ. 'పూర్తి పున్నిమ్ జలమ్' మెన జవున్, 'జా గురితె నిగితి ఆన రితిసి నాయ్' మెన జవున్ తుమ్చితె కో ఏక్ వేల వేర ఉచర్లె, తుమ్క దేముడు దెకవ సికడెదె. 16 గని ముక్కిమ్క అప్పెక కిచ్చొ బుద్ది జో అమ్క సికడ అస్సె గే, జయ్యి నిదానుమ్ ఇండుమ.

17 బావుడ్లు, ఆవ్ కిసి ఇండితసి గే దెక తూమ్ కి ఇసి ఇండ, చి అమ్ ఇండితి రితి కో ఇండితతి గే దెక. 18 కిచ్చొ జాగర్త ఆవ్ సంగితసి మెలె, ఆవ్ అగ్గె తెంతొ తుమ్క సగుమ్జిన్చి రిసా ఒగ్గర్ సంగ అస్సి, చి అప్పె కి ఏడ ఏడయ్ సంగితసి. కిచ్చొక మెలె, 'పరలోకుమ్చి సుద్ది జా, జా సుద్ది రితి ఇండుతు' మెనయ్, క్రీస్తు సిలువతె మొర జోవయింక రచ్చించుప కెర్లన్, గని జాచి ఉప్పిరి విరోదుమ్ కెర్లి రితి జేవ్ ఒగ్గర్జిన్ తప్పు బుద్దితె ఇండితతి. 19 జేవ్ నాసెనుమ్తె గెచ్చుల, జోవయించి పెట్టి జోవయింక దేముడు, జోవయించి పాపుమ్చి రిసా జోవయింక సర్ల, ఈంజయ్ లోకుమ్తె తతిసి ఎత్తికయ్ జోవయింక ఆన.

20 గని, అమ్ జితి రాజిమ్ పరలోకుమీ, చి ఒత్త తెంతొ అన్నె జెతొ రచ్చించుప కెర్లొసాక, ప్రబు జలొ యేసుక్రీస్తుకయ్ అమ్ రకితసుమ్. 21 కిసి మెలె, ఎత్తి జోచి తెడి తియ ఏలుప కెర్తి జోచి సెక్తికయ్ జో అమ్చి ఈంజ మాములుమ్ ఆగ్గె మార్పుప కెర, పరలోకుమ్చి ఉజిడ్ తెన్ చి జోచి ఆగ్గె ఈంజ జితి రితి తెదొడక మార్పుప కెరెదె.

ప్రబుచి తెడి తుమ్ డిట్టుమ్ టీఱ

1 అంక, ప్రేమ తిల బావుడ్లు, *ప్రబుచి తెడి తుమ్ డిట్టుమ్ టీఱ. తుమ్క ఆవ్ ప్రేమ అస్సి, తుమ్తె గెచ్చుక ఒగ్గర్ ఇస్టుమ్ జా అస్సి. తుమ్ అంచి సర్ల, అంచి బవుమానుమ్.

2 తుమ్ జట్టి జలిసి ముల †ప్రబుచి తెడి ఎక్కి కట్టు తా మెన, యువొదియక చి సుంటుకేక ఆవ్ బతిమాల్పా జా మెన సంగితసి. 3 పడ్డో తూయి, అంచి తెన్ ప్రబుచి కామ్తె బెద అంక సత్తిమ్ కెర్టో బావో, ఈంజేవ్ తేర్బోదల్క సేంతుమ్ కెరవు. అగ్గె తెంతో అంచి తెన్ బెద ప్రబుచి నుబుమ్ కబుర్చి కామ్ కెరుక మెన సైమల్ సేడ అస్సి. అన్నె కచి తెన్ మెలె, క్లెమెంతు తెన్, చి 'పరలోకుమ్తె గెచ్చుల' మెన దేముడు కచ కచ నవ్వొ రెగిడ్లి జోచి పుస్తకుమ్తె నవ్వొ తిల మాన్సుల్ ఎత్కిజిన్ తెన్ కి తోడు కెరవు.

కెర్టోడి కి సర్లసంతోసుమ్ తెన్ ప్రార్లన కెర

4 కెర్టోడ్ తెదోడి ‡ప్రబుచి తెడి తుమ్ సర్లసంతోసుమ్ తా. అన్నె సంగితసి. 'సర్లసంతోసుమ్ తా' మెంతసి. 5 తుమ్ ఇసి మెత్తన తతిసి ఎత్కిజిన్ దెక చినితి రితి తుమ్ ఇండ. ప్రబు కిపాసి జా అస్సి. 6 కిచ్చొచి రిసా కి తుమ్ చింత గలన నాయ్, గని కిచ్చొచి రిసా కి ప్రార్లన కెర్టె తా తుమ్క కోర్ప జలిసి సంగ, జో దిలిసి ఎత్కిచ రిసా తుమ్చి సర్ల సంగ, తుమ్చ ఆసల్ దేముడుకయ్ తుమ్ సంగ. 7 దస్సి, అమ్ మాన్సుల్ *మీనుక నెత్తిర్లి దేముడుచి ఎదివాట్ సేంతుమ్, చి క్రీస్తు జలో యేసుచి తెడి తా, జా సేంతుమ్ తుమ్చి పెట్టి తుమ్చి మెన్సుతె రకితె తయెదె.

* 4:1 4:1 మెలె, ప్రబుచి తెడి తా, జోచి డిట్టుమ్క తుమ్ డిట్టుమ్ టీఱ. † 4:2 4:2 మెలె, 'జోవయించి తెడి అస్సున్, చి జో కట్టు దెతోసా. జాచి రిసా తుమ్క కి జా కట్టు బుద్ది తంకయ్'. ‡ 4:4 4:4 మెలె, ప్రబుచి తెడి అస్సున్. జో సర్లసంతోసుమ్ దెతోసా. జేఱ, జోవయించి సర్లసంతోసుమ్ నజన జోవయించి సర్లసంతోసుమ్ తెంతో! జోవయించి తెడి తిల, దస్సి బుద్ది తంక తయెదె. § 4:5 4:5 నెంజిలె, 'అన్నె జెతిసి పాసి జా అస్సి'.

* 4:7 4:7 నెంజిలె 'అర్దుమ్ కెరసుక నెత్తిర్లి...'

8 ఆకర్క, బావుడ్లు, కిచ్చొ మెంతసి మెలె, సత్తిమ్ తిలిసి ఎత్తి, మరియుద తిల కమె ఎత్తి, నాయిమ్ తిలిసి ఎత్తి, సుద్ది తిలిసి ఎత్తి, సూటి తిలిసి ఎత్తి, 'చెంగిల్' మెన ఎత్తిజన్ సర్ల జతిసి ఎత్తి, కిచ్చొ జలెకి చెంగిల్చి, 'చెంగిల్' మెన దేముడు ఒప్పున్తిసి ఎత్తి, దసచయ్ ఎత్తిక ఉచర్తె తా, దస్సయ్ కమె తుమ్ కెర్తె తా. 9 అంచితె తుమ్ సికిలిసి, దెకిలిసి, నూన్లిసి, 'సత్తిమ్' మెన ఒప్పున్లిసి, జా ఎత్తికెర, చి సేంతుమ్ దెత్తె అమ్చొ దేముడు తుమ్చి తెన్ తయెదె.

తిలె కి నెంజిలె కి ప్రబు సేంతుమ్ దెతిసి

10 తుమ్ అప్పె అన్నెక్ సుట్టు అంచి రిసా ఉచర్లసు మెన సూన తా ప్రబుచి తెడి ఒగ్గర్ సర్ల తెన్ అస్సి. అగ్గె తెంతొ కి అంచి రిసా ఉచర్తె తిలదు, గని అంక తోడు దెంక తుమ్క అగ్గె వాటు తయె నాయ్. 11 అంక నెంజిలిన్చి రిసా ఏడుక మెన సంగి నాయ్. కిచ్చొక మెలె, ఆవ్ కిసి జలెకి, అంక కిచ్చొ జలెకి, చింత నే గలంతె సేంతుమ్ తెన్ ఓర్పుప జంక మెన సిక అస్సి. 12 ఎక్కెక్ సుట్టు కొత్తుచి రిసా బాదల్ సేడ అస్సి, ఇదిల్ ఒగ్గర్ తిలిన్చి రిసా కి సర్ల జా అస్సి. దొన్ని కి జాని. కిచ్చొచి రిసా కి, కిచ్చొ జలెకి, తిలె కంక నెంజిలె చువ్వె తంక, సామ్నారుమ్ తిలె కి, కొత్తు తిలె కి, కిసి ఓర్పుప జంక గే ఆవ్ సిక అస్సి. 13 మెలె, క్రీస్తు అంక సెక్తి దెతె తత్తయ్చి రిసా కిచ్చొ జలెకి కెరుక తెరి.

14 జలెకి, అంచి అప్పెచి బాదతె తుమ్ బెద తోడు దిలిసి చెంగిలి. 15 ఆవ్ సుబుమ్ కబుర్ నూనవుక దెర్లి మొదొల్క, ఆవ్ తుమ్చి మాసిదొనియ ప్రదేసిమ్ ములిలి పొది, ఎక్కి తుమి గని వేర సంగుమ్లుతె ఎక్కి కి తోడ్ దెతి నాయ్, ఎక్కిలోక ఎక్కిలో తోడ్ దెతిన్తె అమ్చి తెన్ ఎక్కి తుమి బెదిలదు. 16 ఆవ్ దెస్సలోసిక పట్టుమ్తె తిలి పొది కి అన్నె అన్నె తోడు తెద్రయ్లదు. 17 జలె, తోడుకయ్ అంక ఆస నాయ్, గని అంచి ఆస కిచ్చొ మెలె, కిచ్చొచి రిసా ఆవ్ సర్ల జతసి మెలె, తుమ్ తోడు దిలిసి తుమ్కయ్ లాబుమ్ దెతయ్.

18 నాయ్, గెద, అంక పూర్తి తోడు దా అన్సున్. నాయ్, దొర్కు జలి కంట అన్నెయ్ తోడు ఈంజ. తుమ్ తెద్రయ్లి తోడు ఎత్తి ఎపప్రాదితు అంక దా అస్సె. జా తోడు దిలిసి కిసి జయెదె మెలె, దేముడుక చెంగిల్ దూపుమ్ డయిలి రితి, బలి దిలి రితి, జోక సర్ద కెరెదె. 19 జలె, తుమ్క కిచ్చొ కొత్కు గే, బాద గే అయ్లె కి, జోచి పరలోకుమ్చి సొమ్నారుమ్క దేముడు కవలుసుప జలిసి ఎత్తి క్రిస్తు జలో †యేసుచి తెడి తుమ్క దొర్కు కెరెదె. 20 ఉగుమ్చి ఉప్పిరి ఉగుమ్క అమ్చొ దేముడు అమ్చొ అబ్బొక జెయ్యి! ‡ఆమేన్.

21 క్రిస్తు జలో యేసుచి తెడి తిలో జోవయించి సుద్ది జలో ఒత్తచొ ఎత్తి మాన్సుక తుమ్ అంచి ప్రేమ సంగ. అంచి తెన్ తిల బావుడ్లు కి తుమ్క జోవయించి ప్రేమ సంగ తెద్రయ్తతి. 22 జో ప్రబుచి సుద్ది జా జోచయ్ జల మాన్సుల్ ఎత్తి తుమ్ పిలిప్పి పట్టుమ్చక జోవయించి ప్రేమ సంగ తెద్రయ్తతి. ముక్కిమ్క కొన్న మెలె, క్షైసర్ రానొతె కామ్ కెర్ల నంపజలనక సంగ.

23 ప్రబు జలో యేసుక్రిస్తుచి దయ తుమ్చి ఆత్మ తెన్ తవున్.

† 4:19 4:19 యేసుచి తెడి జేవ్ నంపజలన అస్తిచి రిసా, చి జోవయించ వరల్ ఎత్తి యేసుచి అత్తి దెతయ్చి రిసా 'యేసుచి తెడి' మెన రెగ్గ అస్సె. ‡ 4:20 4:20 ఈంజేవ్ పుస్తకుమ్ తొలితొ రెగిడ్డి గ్రికు బాస తెన్ 'తెద్దిలి' మెలిన్క 'ఆమేన్' మెనుల. § 4:22 4:22 నెంజలె 'వెల్లొ రానొతె'.

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4